

Wie der Hutt uf die Kerch kumm is

Des war noch in de gute alte Zeite, villeicht an dr Kerweih, odr an e groß Hochzeit. De Vettr Michl vun Schannndrhaas hat wieder Gäscht ghat, vun 'me anre Dorf. Sie ware in de Kerch und sinn dernoh im Rundell (Rondell, runder Dorfplatz) rumspaziert, for sich des anschau. Am Owed, nohm Nacht-esse, hann de Vettr Michl un sei Gascht, de Vettr Hanns un sei Leit, noch in dr Kuchl gsitzt un a paar Gläser Wein getrunk. Noh saat dr Vetter Hanns: „Du, Mischko, for was is der Hutt dort owwe uf eier Kerch, uf dem Gstell zwische de zwaa Turme? Do muß doch a Gschicht drhinner steche?“ De Vetter Michel, wu jo schun immer gere Gschichte vrzählt hat, hat'm zugstimmt: „Jo, sicher, do steckt e scheni Gschicht drhinner, un die wärr ich dir jetz vrzähle. Wie du jo weescht, is Schannndrhaas erscht im tausendachtthunnertdreiund-dreißiger Jahr gebaut ginn. Die Leit sinn aus dr Umgebung eingwannert, also vun Billed un Bugarisch, vun Grawatz un Tribbswettr, sogar vun Lenaheim, des wu domols jo noch Tschaddad gheescht hat. Sie hann sich misse ihre Heiser selwer baue un hann des aach gschaftt, weil die ganz Vrwandtschaft mitgholf hat. Wie se mit dem Baue fertich ware un ingezoo sinn, hann se aach e Kerch gebraucht; gell, was is schun a schwowisches Dorf ohne Kerch? Ihre Kerch hann se natierlich ins Rundell baue wille, awr sie sinn sich net eenich ginn, in welches Viertl vum Rundell. De Richter un sei Gschworene hann drum e Sitzung im Gmeindehaus abghall, dass sie es Platz for die Kerch bestimme. Sie sinn sich awr aach desmol net eenich ginn. Geger Owed sinn se ins Großwertshaus gang, for etwas esse un aach trinke. Wie se später ausm Werts-

haus rauskumm sinn, ware se in guter Stimmung. De Richter hat sei Hutt runnerghol un hat gsaat: „Leit, ich werf jetz mei Hutt in die Luft, un wu er runnerfällt, dort will unsr Hergott sei Kerch hingebaut hann.“ Der Hutt is is Mitte uf der Landstroß gfall, gnau dort, wu sich die Hauptgass un die Ujhel-Warjaschgass iwerkreize. Zuerscht hann die Gschworene gemennt, dass mer die Kerch doch net mitte uf die Stroß baue kann, weil des doch die Temeschwar-Szegediner Landstroß war. Awwer de Richter hat se iwerzeiht, und die Kerch is so gebaut ginn, dass die Landstroße Umwech um die Kerch mache muss. Weil awwer em Richter sei Hutt des war, wu des Platz vun dr Kerch bstimmt hat, hann die Leit beschloss, dass dr Hutt dort owe, zwische dene zwaa Turme, sei Platz finne soll.

Em Vetter Hanns hat die Gschicht gut gfall, un sie sinn schlofe gang. Am nächschte Morjet, wie er grad ingspannt hat, saat ihm de Vetter Michl: „Hanns, du hascht doch die Gschicht mit dem Hutt net ernscht ghol? In Wirklichkeit is des Gstell mitm Hutt jo 's Wappm vun unsrer domoliche Herrschaft, des war dr Alexander vun Alagowitsch, de Bischof vun Agram. Der großi Hutt is jo e Bischofshutt, un die acht Quaschtle uf jeder Seit bedeute, dass er sogar e wichticher Bischof war. Die Mitra un de Bischofsstab sinn die kerchliche Kennzeiche. Un des weiße Wappm hat mit seiner nowle Familje zu tun.“

Ich hann die Gschicht vum Vetter Michl ufgschrieb und meeht noch saan, dass die Sunn in dem Wappn im Oschte ufgeht un de Halbmond im Weschte unnergeht, wie uf dem donauschwäbische Wappn (also die Tirkzeit is rum un Esterreich herrscht). Un der Kraa (Krähe) mit dem Ring in dr Schnawwl heißt uf lateinisch Corvus. Es wär meglich, dass unsrem Bischof sei Familje vun de Corviner in de Adelstand erhob is si ginn, des kennt jo sein.

